


छठमा महिना स्वरगदूत जिब्राईल भगवान के पल्ला लग, गलील परदेस नासरत नामक सहर हे अक्ठी कुमारी के लिघघो पठोय गइस। अक्ठी कुमारी के लिघघो पठोइस, जेखर ओली राजा दाऊद के घराना यूसुफ नाम के डउका लग होथै, ऊ कुमारी के नाम मरियम रथै।



स्वरगदूत ओखर लग कथै, मरियम झइ डर,
भगवान के अनुगरह किरपा तोर हे होय हबै।
सुन तै लादा हे होबे अउ अक्ठी टोरवा के
पइदा करिहे, अउ तै ओखर नाम यीसु
रखबे। ऊ बडा होही अउ परम परधान
भगवान कर टोरवा कहाही, अउ
परभु ओखर बाफ दाऊद के
राजगद्दी उके दइ। ऊ सबरोज तक
याकूब के घराना हे राज करी, अउ
ओखर राज के अंत कबहुन
खतम नेहको होही।



मरियम स्वरगदूत लग कथै, "हइ कसके सम्भव होही? काखे मै तो कुमारी हव।" स्वरगदूत जबाब देथै, "तोर लिघघो पवितर आतमा आही, अउ परम परधान के सक्ति तोके अपन छाया हे लइ लेही, हइमेर ऊ पइदा लय बाले पवितर लरका भगवान कर टोरवा कहाही।"



मरियम हरबी यहूदा परदेस के डोंगर इलाका छो अक्ठी
सहर हे कठ गइस। जब मरियम जकरयाह के घर छो
पहुंचथै, अउ इलीसिबा के नमस्ते करिस। जब इलीसिबा
मरियम के नमस्ते के सुनिस, ता
लरका ओखर लादा हे उछल
पडिस, अउ इलीसिबा पवितर
आतमा लग भरपूर हुइ गइस।
इलीसिबा बोहत आरो लग
कथै, "मरियम तै सगलू
डउकिन हे धन्य हबस,
अउ जउन लरका के तै
पइदा करही ऊ धन्य हबै।"



यीसु मसीह कर पइदा हइ मेर होथै, जब ओखर दाय मरियम कर ओली
फलदान यूसुफ कर संग होथै,
पय असना होथै कि काज होय लग
पहिलेन, मरियम पवितर आतमा
कर द्वारा देह हे हुइ जथै।
यूसुफ धरमी मनसे होय के
कारन मरियम कर बेज्जती
नेहको करै के चाहथै,
पय ओही लुके छुपे
उतरवामै के बिचार करथै,



... जब यूसुफ हइ बातन के बारे हे सोचथै बिचारथै, ता उके सपना हे परभु कर स्वरगदूत आय के कथै, हे यूसुफ दाऊद कर टोरवा, अपन डउकी मरियम के अपन घर छो लाने लग झइ डर, काखे जउन ओखर देह हे हबै, ऊ पवितर आतमा के दवारा हबै। ऊ अकठी टोरवा पइदा करही, तै ओखर नाम यीसु धरबे, काखे ऊ अपन मनसेन कर उनखर पापन लग मुकति करही।



जब यूसुफ नींद लग जागथै, ता परभु के स्वरगदूत कर आदेस के जसना ऊ मरियम लग काज कर लेथै, अउ ऊ अपन घर हे लइ आनथै। अउ जब तक मरियम टोरवा के पइदा नेहको करिस, तब तक यूसुफ ओखर लिघघो नेहको गइस, अउ यूसुफ ओखर नाम यीसु धरथै।



उन रोजन हे अवगुस्तुस कैसर राजा के पल्ला लग अक्ठी आदेस
निकारिस, कि सगलू रोमी दुनिया के नाम लिखवामै जाय।
सगलू मनसे अपन नाम लिखवामै
के निता, अपन-अपन
सहर हे गइन।



यूसुफ दाऊद के घराना अउ बिरादरी के रथै, इहैनिता गलील परदेस के
नासरत सहर लग, यहूदिया परदेस हे दाऊद के सहर बैतलहम छो
गइस। कि यूसुफ
अपन मंगेतर मरियम के संग
जउन लादा हे रथै,
नाम लिखवामै जथै।



जब ऊ उहां रथै, तब मरियम के लरका पइदा होय के टेम आय गइस।



अउ मरियम अपन पहिले टोरवा के पइदा करिस, अउ ओही फरिया हे लपेट के सार हे सोबाय देथै, काखे रुकै के निता कउनो जिघा नेहको मिलथै।



यहूदिया परदेस हे बरेदिया रात के टेम, मइदान हे अपन गडरन के ताकथै। उहै टेम परभु के अकठी स्वरगदूत बरेदियन के लिघघो आथै, अउ परभु के तेज उनखर चारो पल्ला चमकथै, अउ उन बोहत डेराय जथै।



स्वरगदूत बरेदियन लग कथै, झइ डर देखिहा मै तुमही बडा खुसी के
संदेश सुनाथों, जउन सगल मनसेन के निता होही। काखे आज दाऊद के
सहर हे तुम्हर निता, अक्ठी मुकति करै बाले
पइदा लय हबै, इहै परभु मसीह हबै।

ओखर
चिन्हारी के
निसानी हइ हबै,
कि तुम अक्ठी
लरका के फरिया

हे लपटरे हर अउ
सार हे सोउत पइहा।



उहै टेम अचानक स्वरगदूत के स्वरगी सेना के बिसाल समूह दिखाई
देथै, जउन हइ कहत भगवान के भजन करथै, सबले
ऊंच स्वरग हे भगवान कर महिमा, अउ भुंइ हे
उन मनसेन के
सान्ति



मिलै, जिनखर लग
ऊ मगन हबै।



जब स्वरगदूत बरेदी लग बिदा हुइके स्वरग छो कढ
जथै, ता बरेदिया अक्ठी दूसर लग हइ कथै, आबा हम
बैतलहम सहर छो जाय के, ई बात के जउन हमार संग
होय हबै, अउ परभु हमके उजागर करे हबै।



इहैनिता बरेदी हरबी चल दिहिन, अउ उहां जायके
उन मरियम अउ यूसुफ के पाइन, अउ देखिन कि
लरका सार हे सोय हर हबै। बरेदिया जब उके देखथै,
ता हइ लरका के बारे हे जउन संदेस उनके
दय गय रथै, उके उन सब के बताय
दइन।



यीसु के जनम यहूदिया
परदेस बैतलहम सहर हे
हुइस, ऊ टेम हेरोदेस
राजा रथै, यीसु कर जनम
के बाद वैदी मनसे
पूरब देस लग

यरुसलेम सहर छो आय रथै।
यहूदिन के राजा जेखर पइदा होय हबै ऊ
कछो हबै? काखे हम दिन उगती छो ओखर
तरइया देखे हबन, अउ ओहि हम निहुर के
परनाम करै आय हबन।



तब हेरोदेस ज्योतिसिन के चुपके लग
बुलवाय के पूछथै, तरइया
ठीक कउन टेम दिखाई दय
रहिस? राजा ज्योतिसिन लग
हइ कहिके बैतलहम पठोथै,
"कि जायके ऊ लरका कर बारे
हे ठीक-ठीक पता लगामै,
जब मिल जही ता मोके गुठेइहा,
ता महं ओखर परनाम करहुं।"



उन राजा कर बात के सुनके उछो लग कढ जथै, अउ जउन तरइया दिन
उगती छो देखे रथै, ऊ उनखर आगू-आगू चलै लागथै, अउ जउन जिघा
हे लरका रथै, ऊ जिघा के उप्पर जाय के रुक
गइस।



उन घर के भित्तर जाय के बाद हे, वैदी यीसु के ओखर दाय मरियम के संग देखथै, उन मुंह के बल गिरके ओही निहुर के परनाम करथै, अउ

अपन-अपन थइली खोलके उके सोना अउ लोबान

अउ गन्धरस के बलि चढाथै। तब उनही सपना हे भगवान वैदिन के चेतन्त कर देथै, कि हेरोदेस के लिघघो लउट के झइ

जइहा, ता उन दूसर गली लग अपन देस छो कढ जथै।



वैदिन के जाय के बाद परभु कर अक्ठी
स्वरगदूत सपना हे आय के यूसुफ लग
कथै, "उठ जा अउ लरका के अउ ओखर
दाय के लइके मिस्र देस छो कढ जा,
जब तक मै तुमही नेहको कइहों, तब
तक उहै छो रहबे, काखे, हेरोदेस
हइ लरका के मारै के डांटथै।"
यूसुफ उठिस अउ लरका
अउ ओखर दाय के लइके, रातो
रात मिस्र देस छो





कढ जथै।



अउ हेरोदेस राजा के मरै तक उहै छो
रथै, ता ऊ बचन जउन परभु ग्यानी
मनसेन के दवारा कहै रथै, कि मै अपन
टोरवा कर मिस्र देस लग बाहिर
बुलवइहो, ऊ बात पूर हुइ सकै।



जब हेरोदेस हइ देखथै, कि ज्योतिसी
मोके नरे हबै, ता ऊ गुस्सा लग भर
जथै, अउ सिपाही के पठोय के
ज्योतिसी द्वारा ठीक-ठीक बताय हर
बात के जसना, बैतलहम अउ ओखर
अगल बगल जिघा के सगलू लरका के
दुइ साल के या ओखर लग नान रथै,




सबजन के मरवा डारथै।



हेरोदेस राजा के मरै के बाद, परभु कर
स्वरगदूत मिस्र हे यूसुफ के सपना दइके
कथै, "उठ, लरका अउ ओखर दाय के
लइके इस्राएल देस छो कठ जा, काखे
जउन लरका के मारै चाहथै ऊ मर
गय हबै।"



पय जब यूसुफ हइ सुनथै, कि अरखिलाउस
अपन बाफ हेरोदेस के
जिघा यहूदिया परदेस हे राज
करथै, ता ऊ उछो जाय लग
डरथै, फेर भगवान
लग आदेस



पाय के ऊ गलील परदेस
छो कढ जथै। अउ नासरत नाम के सहर छो
जायके बस जथै, ताकि ऊ बचन पूर होय जउन
ग्यानी मनसेन के द्वारा गुठेय गय रथै, "ऊ नासरी कहाही।"



भगवान हइ दुनिया लग अइसन माया करिस,
कि ऊ अपन अकठी टोरवा के दइ दइस, ताकि
जउन कउ ओखर उप्पर बिस्वास करही, ऊ
नेहको मरही, बलुक सबरोज के जीवन पाही।



रोमियो 3:23 काखे सगलू ज्ञान पाप करे हबै अउ सगलू ज्ञान भगवान कर महिमा लग दुरिहां हुइ गय हबै।

रोमियो 6:23 काखे पाप के मजदूरी ता मरै के हबै, पय भगवान के बरदान हमर परभु यीसु मसीह हे सबरोज के जीवन हबै।

इब्रानिन 9:27 जउन मेर मनसेन के निता अक्कै बेर मरना अउ एखर बाद ओखर नियाव होय के निता तय हबै।

इफिसियों 2:8,9 काखे बिस्वास के द्वारा अनुग्रह लग तुम्हर मुकति होय हबै अउ हइ तुम्हर पल्ला लग नेहको, पय भगवान के बरदान हबै, हइ तुम्हर कउनो काम के कारन नेहको मिलथै, असना झइ होय कि कउ घमंड करै।

रोमियो 10:9,10 काखे अगर तुम मुंह लग सुइकार करथा कि यीसु परभु हबै, अउ मन लग बिस्वास करथा कि भगवान उके मरे हर मसे जिन्दा करिस, ता तुमही मुकति मिलही। काखे नियाइपन के निता मन लग बिस्वास करै लग धरमी मनसे ठहरथै, अउ मुंह लग सुइकार करै लग उके मुकति मिलही।



यूहन्ना 3:16,17 "भगवान हइ दुनिया लग अइसन माया करिस, कि ऊ अपन अक्ठी टोरवा के दइ दइस, ताकि जउन कउ ओखर उप्पर बिस्वास करही, ऊ नेहको मरही, बलुक सबरोज के जीवन पाही। भगवान अपन टोरवा के दुनिया हे इहैनिता नेहको पठोइस कि दुनिया हे सजा के आदेस दे, पय इहैनिता दुनिया ओखर द्वारा मुकति पाबै।"

1 यूहन्ना 5:11-13 अउ ऊ गवाही हइ हबै, भगवान हमके सबरोज के जीवन दय हबै, अउ हइ जीवन ओखर टोरवा हे हबै। जेही टोरवा मिल गय हबै, ओही जीवन मिल गय हबै, अउ जेही भगवान कर टोरवा नेहको मिले हबै, ओखर हे जीवन नेहको हबै। तुम सगला भगवान कर टोरवा के नाम हे बिस्वास करथा, मै तुमके हइ चिट्ठी लिखथो जेखर लग तुम हइ जान लेया कि तुमही अनन्त काल के जीवन मिले हबै।



मत्ती 1-2; लूका 1-2

Storyline by: Edward D. Hughes

Illustrated by: M. Maillot
and Alastair Paterson

Adapted by: E. Frischbutter; Sarah S.

Bhumiya Bible (bhu) © The Word for the World International
and © 2025 Bhumiya Bhasha Samiti, Madhya Pradesh

<https://www.bible.com/en-GB/bible/3712/MAT.1.BTP25>

©2026 Bible for Children, Inc.

www.M1914.org

www.bibleforchildren.org

